



Broj: 09-03-20-2183/09  
Sarajevo, 06.05.2009.

Na osnovu člana 13. stav (1) tačka o) i člana 15. stav(1) tačka a) Zakona o odbrani Bosne i Hercegovine ("Službeni glasnik Bosne i Hercegovine", broj 88/05) i Politike o upravljanju kapacitetima radiorelejnih čvorišta Ministarstva odbrane Bosne i Hercegovine, d o n o s i m

**PRAVILNIK**  
**o izdavanju kapaciteta stacionarnih komunikacijskih čvorišta Ministarstva odbrane**  
**Bosne i Hercegovine za druga pravna lica**

**I – OPŠTE ODREDBE**

**Član 1.**  
**(Predmet Pravilnika)**

Ovim pravilnikom utvrđuju se uslovi i odgovornosti izdavanja kapaciteta stacionarnih komunikacijskih čvorišta Ministarstva odbrane Bosne i Hercegovine (u daljem tekstu: SKČ-kapaciteti) za potrebe drugih pravnih lica (u daljem tekstu: Drugi korisnici).

**Član 2.**  
**(Definicije)**

- a) Stacionarno komunikacijsko čvorište je objekat podesan za instaliranje radio i radiorelejne opreme i sistema.
- b) SKČ-kapacitet je prostorni kapacitet na stacionarnom komunikacijskom čvorištu ili kapacitet u smislu elektromagnetne kompatibilnosti.
- c) Elektromagnetna kompatibilnost je mjera mogućnosti da dva i više uređaja, koji zrače elektromagnetne talase, mogu funkcionisati na istom prostoru.

**II – USLOVI IZDAVANJA SKČ-KAPACITETA ZA DRUGE KORISNIKE**

**Član 3.**  
**(Opšti uslovi izdavanja SKČ-kapaciteta za Druge korisnike)**

(1) Ministarstvo odbrane Bosne i Hercegovine (u daljem tekstu: Ministarstvo) odobrit će korištenje SKČ-kapaciteta za Druge korisnike samo ako to neće ugroziti sisteme Ministarstva.

(2) Drugi korisnik će odobrene SKČ-kapacitete koristiti u skladu sa ugovorom i neće ih izdavati za treća lica.

(3) Da bi se odobrilo korištenje SKČ-kapaciteta za Drugog korisnika, isti mora pribaviti sve potrebne dozvole za rad opreme i sistema koji će biti instalirani u okviru odobrenih SKČ-kapaciteta.

#### **Član 4.**

##### **(Posebni uslovi izdavanja SKČ-kapaciteta za Druge korisnike)**

(1) Između Ministarstva i Drugog korisnika zaključuje se ugovor u kojem se specificiraju detalji izdavanja SKČ-kapaciteta.

(2) Drugi korisnik će Ministarstvu plaćati naknadu za korištenje SKČ-kapaciteta. Naknada se određuje u skladu sa važećim cjenovnikom i precizira se u ugovoru.

### **III – ODGOVORNOSTI**

#### **Član 5.**

##### **(Procedura izdavanja SKČ-kapaciteta)**

(1) Sektor K4 UI Ministarstva će za svaki konkretni zahtjev u saradnji sa Zajedničkim štabom Oružanih snaga Bosne i Hercegovine (u daljem tekstu: ZŠ OS) utvrditi postojanje opštih uslova za izdavanje SKČ-kapaciteta.

(2) Ukoliko su ispunjeni opšti uslovi za izdavanje SKČ-kapaciteta, Sektor K4 UI Ministarstva će uputiti prijedlog Sektoru za nabavku i logistiku Ministarstva za sprovođenje procedure ugovaranja izdavanja SKČ-kapaciteta za Drugog korisnika.

(3) Sektor za nabavku i logistiku Ministarstva će na osnovu aktivnosti iz prethodnog stava sprovesti proceduru zaključivanja ugovora.

#### **Član 6.**

##### **(Cjenovnik korištenja SKČ-kapaciteta)**

Sektor K4 UI Ministarstva će u saradnji sa Sektorom za finansije i budžet i Sektorom za nabavku i logistiku Ministarstva u roku od 60 dana od donošenja ovog Pravilnika pripremiti cjenovnik korištenja SKČ-kapaciteta i po potrebi ga ažurirati.

**Član 7.**  
**(Odobrenje za pristup stacionarnim komunikacijskim čvorištima)**

Sektor K4 UI Ministarstva će pripremati potrebna odobrenja za Druge korisnike za pristup stacionarnim komunikacijskim čvorištima u cilju instaliranja i održavanja opreme.

**Član 8.**  
**(Omogućavanje pristupa stacionarnim komunikacijskim čvorištima)**

Na osnovu odobrenja, iz prethodnog člana Pravilnika, ZŠ OS će preduzimati potrebne aktivnosti u cilju omogućavanja pristupa Drugih korisnika stacionarnim komunikacijskim čvorištima.

**IV – PRELAZNE I ZAVRŠNE ODREDBE**

**Član 9.**  
**(Prelazna odredba)**

Stanje postojećih korisnika SKČ-kapaciteta urediti u skladu sa Pravilnikom u roku od 6 mjeseci od dana stupanja na snagu.

**Član 10.**  
**(Završna odredba)**

Pravilnik stupa na snagu danom donošenja.

